

四庫全書

子部

欽定四庫全書

太平御覽卷四十一

宋 李昉等 撰

地部六

會稽山

天台山

茅山

廬山

羅浮山

蔣山

九疑山

玉笥山

會稽山

吳越春秋曰禹巡天下歸還越會稽修治國之道以會計名山

又曰禹巡天下歸還大越登茅山以朝四方羣臣觀中州諸侯防風後至斬以徇衆示天下悉以臣屬也乃大會計治國之道更名茅山曰會稽

越絕書亦載

傳曰勾踐以甲楯五千保於會稽

史記曰始皇本紀曰三十七年上會稽祭大禹望于南

海而立石刻頌秦德

九土文括畧曰禹禪此山一石穴委曲黃帝藏書於此
禹得之

孔靈之會稽志曰會稽山在縣東南其上石狀似覆釜
禹夢玄夷會蒼水使却倚覆釜之上是也今禹廟在下
秦始皇嘗配食此廟

又曰山有石室云是仙人射堂東高岩有射的石還望
的的如射侯形圓視之如鏡士人常以占穀食貴賤射

的明則米賤暗則米貴諺曰射的白斛一百射的玄斛
一千夏侯曾先志曰此山有石帆壁立臨川湧石亘山
遙望芄芄有似張帆也又有懸巖名為射堂傳云仙人
常射於此使白鶴取箭此是會稽東峰

郡國志曰山上有草莖赤葉青人死佩之便活

山海經曰會稽之山四方上多金玉下多砮砮上有禹
塚及井

天台山

臨海經曰天台上超然出天山有八重視之如一帆
高一萬八千丈周迴八百里又有飛泉懸流千丈似布
故登真隱訣云此山有桐栢繞四明東南三百里

啓蒙記注曰天台山去人不遠路經福溪水險清泠前
有石橋路逕不盈尺長數十丈下臨絕冥之澗唯忌其
身然後能躋躋者梯岩捫蘿葛之莖度得平路見天
台山蔚然綺繡列雙嶺於青霄上有瓊樓玉閣天堂碧
林醴泉仙物畢具晉隱士白道猷得過之獲醴泉紫芝

靈藥

神異經曰餘姚人虞洪入山採茗遇一道士牽三青羊引洪至天台瀑泉曰吾丹丘子也聞子善具飲常思見惠山中有大茗可以相給祈子他日有甌犧之餘不相遺也因立奠祀後常與家人往山獲大茗焉

晉書曰許邁與王羲之書云自山陰至臨海多有金庭玉堂仙人芝草

異苑曰會稽天台山遐遠自非忽生忘形不能躋也赤

城阻其逕瀑布激其衢石有莓苔之險澗有不測之深
幽明錄曰漢明帝永平五年剡縣劉晨阮肇共入天台
山取穀皮迷不得返經十餘日糧盡飢餒殆死遙望山
上有一桃樹大有子實而絕巖邃澗了無登路攀葛捫
蘿至上噉數枚而飢止體充復下山持杯取水飲步進
漸見蕪菁葉從山腹流出甚鮮新復一杯流出有胡麻
飯相謂曰此處去人徑不遠度山出一大溪溪邊有二
女子資質妙絕見二女持杯出便笑曰劉阮二郎捉向

所失流杯來晨肇既不識之二女便呼其姓如似有相見忻喜問來何晚耶遂同還家家皆瓦屋南壁下各有一大牀及東壁皆施絳羅帳角懸鈴上金銀交錯牀頭各十侍婢便勅云劉阮二郎經涉山阻向雖得瓊室猶尚虛弊可速作食有胡麻飯山羊脯甚美食畢行酒有羣女來各持三五桃子笑而言賀女壻來酒酣作樂劉阮忻怖交并至暮令各就一帳宿女往就之言聲清婉令人忘憂至十日後求還去女云君已來是宿緣所牽

何復欲還耶遂留半年氣候草木是春時百鳥呼鳴更
懷土求歸甚苦女曰當如何遂呼前來女子有三四十
人集會奏樂共送劉阮指示還路既出親舊零落邑屋
改異無復相識問得七世孫傳聞上世入山迷不得歸
孔靈符會稽記曰赤城山土色皆赤岩岫連沓狀似雲
霞懸溜千仞謂之瀑布飛流洒散冬夏不竭山谷絕澗崢
嶸無底長松葛藟幽藹其上

又曰赤城山內則有天台靈嶽玉室璿臺

又曰天台山舊居五縣之餘地五縣者餘姚鄞剡台寧也孫綽天台山賦曰濟猶谿而直進落五界而迅征

續搜神記曰會稽剡縣民袁相狼碩二人獵經深山重嶺甚多見一羣山羊六七頭遂經一石橋橋甚狹而峻羊去狼等亦隨渡向絕崖崖正赤壁立名曰赤城上有水流下廣狹如疋布剡人謂曰瀑布羊徑有山穴如門豁然而過既入內甚平敞草木皆香有一小屋二女子住其中年皆十五六容色甚美著青衣一名瑩珠見二

人至忻然云早望汝來遂為室家忽二女出行云復有
得壻者往慶之曳屐於絕岩上行琅琅然二人思歸潛
去歸路二女追還已知乃謂曰自可去乃以一絳囊與
狼語曰慎勿開也於是乃歸後出行家人開其囊囊如
蓮花一重去一重複至五重中有小青鳥飛去狼還知
此悵然而已後狼於田中耕家依常餉之見在田中不
動就視但有殼如蟬蛻也

茅山

茅君內傳曰句曲山秦時名為華陽之天三茅君居之
因而為名外金山因擅為號矣周時名其源澤澤為句
曲之穴紫山形曲折後人名為句曲之山山間有金陵
之地四十七八頃是金壇之地肺也居其地必得度世
許邁列傳曰延陵之茅山是洞庭西門潛通五岳

茅山記曰大茅山獨高處玄帝命東海神埋大銅鼎於

山頂深八尺上有盤石鎮之

顓頊水德
故號玄帝

又曰秦始皇三十七年遊會稽還於此山北埋白璧一

雙深七尺李斯刻篆壁文云始皇聖德平章山河巡狩
蒼州勒石素壁

又曰王莽地皇三年七月遣使者章邕陳獻銅鐘五口
黃金百鎰贈之於三茅君

又曰中茅山其司山獨處司命君埋玉門丹砂六十斤
鎮於此山深二丈上有盤石鎮之其山左右泉流下皆
小赤色飲之延年益壽左真人就司命乞得一十二斤
以合九華丹山頂石壇石案香爐今在焉

今三陽有姓
閻多有壽長

者蓋太陽北陽
朱陽三析耳

又曰小茅山漢光武帝以建武元年三月遣使吳倫賁
金五十斤陳獻三茅君今山頂有金處存焉上有聚石
又曰開城中高修女真侯仙姑絕穀六十餘年壽逾百
歲帝嘗息此山洞入府獲覩徵祥

又曰咸通中東海蓬萊觀龔道者初入此山斷穀茹芝
十餘年後因正月朔旦焚香洞門恍惚之間得入洞中
經由一十三日備見洞府岩壁山川星辰日月靈異難

詳

又曰昔仙一人捧一大石臨險峻是謂神設一人推之
若欲崩墜百人推之亦復如故真誥曰中茅前一長嶺
直挂大茅山後古多積金寶故因此著名真白依東流
水合神丹道壇竈存疊玉峰大茅山東南三山積疊亦
有洞穴俗多呼疊石石與玉猶為同類山作三角又呼
三角山殊無影響今去葛仙翁壇相近

廬山

廬山記曰山高二千三百六十丈周迴二千五十里東南三十二里張僧鑿潯陽記云匡裕周武王時人屢逃徵聘結廬此山後登仙穹廬尚在弟子等呼為廬山又名匡山蓋稱其姓又按豫章匡裕字君孝共鄱陽令吳芮佐漢定天下封裕鄱陽廬君兄弟七人皆好道術遂寓精爽於洞之中故世謂廬山漢光武南巡時親見神靈封裕為文明公一云匡裕漢人一云周武時人未知誰是

遠法師廬山記曰山海經曰廬江三天子都有匡裕先生者出自殷周之際隱遁避世潛居其下或云裕受道於仙人而共遊其嶺遂記室懸岫即岩成館故時人謂其所止為神仙之廬山南有石門似雙闕壁立千餘仞而瀑布流焉

述異記曰廬山有三石梁長數千丈廣不盈尺俯盼杳然見底咸康中江州刺史庾亮迎吳猛攜弟子登山遊觀因過此梁見一老公坐住樹下以玉杯承甘露與猛

猛遍與弟子又進至一處見崇臺廣厦玉宇金薤琳琅
焜耀輝彩眩目多珍寶玉器不可識見數人與猛共言
若舊相識

周景式廬山記曰登廬山望九江以觀禹之迹其茲峯
乎東南隱諸嶺不得駢矚自廬山人迹所暨迥望無復
出此者每雨其下成潦而上猶皎日

遠法師遊山記曰自托此山二十二載凡再詣石門四
遊南嶺東望香爐秀絕衆形北眺九疑流神覽視四岩之

內猶觀之掌馬傳有石井方湖足所未踐

張野廬山記曰廬山天將雨則有白雲或冠峯巖或亘中嶺俗謂之山帶不出三日必雨

潯陽記曰廬山頂上有一池水池中有三石鴈霜落則飛山北有五老峰於廬山最為峻極橫隱蒼穹積石巖巉迥壓彭蠡其形勢迥如中虞鄉縣前五老之形故名之

廬山記曰紫霄峯秦始皇曾登之與雲漢相接故名之

高處有禹刻大如掌背隱起焉

又曰王敦誅術士吳猛附船日行千里追者但見龍附其船猛令船人閉目人聞曳撥林木之聲懼而開目龍知人見遂委舟山頂今艚底在紫霄峯上

又曰陶潛栗里今有平石如砥從廣丈餘相傳靖節先生醉卧其上在廬山南

神仙傳曰董奉字君異侯官人少有道術居此山多救人疾苦種杏於此山十數年杏有十數萬株結實奉乃

多倉廩宣言人買杏多少不須來報但一器穀一器杏
多者則為猛獸所害人懼無敢欺者得穀悉賑貧乏

羅浮山

南越志曰此山本名蓬萊山一峯在海中與羅山合因
名焉山有洞通句曲又有瘡房瑤室七十二所

裴淵廣州記曰羅浮二山隱伏唯石樓一路可登

晉中興書曰葛洪上羅浮山鍊丹在山積年忽與廣州刺
史鄧岱書云當欲遠行岱得書狼狽而洪已亡顏色如

平生體輕弱如空衣時咸以為神仙

茅君內傳曰羅浮山之洞週迴五百里名朱明耀真之
天

羅浮山記曰羅羅山也浮浮山也二山合體謂之羅浮
在層城博羅二縣之境有羅水南流流于海舊說羅浮
高三千丈長八百里有七十二石室七十二長溪神湖
神禽玉樹朱草相傳曰浮山從會稽來今浮山上猶有
東方草木

又曰鮑靚字子玄上黨人博究仙道為南海太守晝臨
民政夜來羅浮山騰空往還

裴淵廣州記曰羅山隱伏唯石樓一路時有閒遊者少
得至山際大樹合抱極目視之如薺菜在地山之陽有
一小嶺云蓬萊邊浮來者此因名號羅浮

名山畧記曰羅浮山有阿育王塔三十二所雜道書南
浮郡傳曰羅山諸仙人所居之山也惡人不得至上惡
人至山有獸即擊之投於岩下

蔣山

地輿志曰蔣山舊名金陵山因此山立名金陵

徐爰釋門畧曰諸葛亮以為鍾山龍盤即蔣山也

金陵圖曰後漢末蔣子文為金陵尉逐盜鍾山北為賊傷額而死常謂青骨死當為神至吳大帝立都子文乘白馬搔頭執烏羽見形故令史曰吳王為立廟不爾當百姓大疫大帝猶未信又翌日見於路當令飛蟲人人耳後如其言帝乃立廟鍾山封子文為蔣侯名為蔣山

是也

沈約宋書云蕭思話領左衛常從太祖登鍾山北嶺石上彈琴因賜以銀鍾謂曰相賞有松石間意焉

梁書曰武帝時旱甚詔於蔣山神求雨十旬不降帝怒命載荻焚廟并其神影日既午即將起火當神上忽有雲如繖蓋湏臾驟雨堂中宮殿皆自震動帝詔使停火山謙之丹陽記曰京師南北並有連嶺而蔣山獨隆穹峻異其形像龍實揚都之鎮也孫權葬山南因名曰孫

陵

又曰出建陽門望鍾山之與覆舟似上東門首陽之與北邙也

金陵地記曰秦始皇時望氣者云金陵有天子氣埋金玉雜寶於鍾山乃斷其地更名曰秣陵

又曰蔣山本少林木東晉令刺史罷還鄉種松百株郡五十株

又曰周顒字彥倫隱居蔣山出為臨海令罷還都欲遊

舊居孔稚珪作北山移文以譏之曰鍾山之英草堂之靈馳烟驛路勒移山庭

九疑山

山海經曰九疑山舜所葬焉永陵在長沙零陵界秦始皇三十七年十二月行至零陵望祀虞舜於九疑也

漢書曰武帝元封五年南巡狩至於盛唐望禮虞舜於九疑

山海經曰南山蒼桐之丘蒼桐之淵其中有九山焉舜

之所葬在長沙零陵界

湘中記曰九疑山在營道縣九山相似行者疑惑因名九疑

盛弘之荊州記曰九疑山盤基數郡之界連峰接岫競秀爭高含霞捲霧分天隔日

郡國志曰九疑山有九峯一曰朱明峯二曰石城峯三曰石數峯形如樓四曰娥皇峯下有舜池池傍春日百鳥生卵人取之則迷路致不可得五曰舜源峯比衆峯

最高上多紫蘭六曰女英峯舜墓於此峯下七曰蕭韶
峯峯下即象耕種之處八曰桂林峯馬明生遇安期授金
液神丹之處九曰梓林峯周義山字秀通開石函得李
山經讀之得仙也有九水七則歸流嶺北二則翻注廣
南

淮南子曰九疑之南陸事寡而水事多

王歆之神境記曰九疑是舜之葬處也有青澗中有黃
色黃蓮花芳氣盈谷此山之表復有一峯望之似人形

映出雲端如積玉高於諸山頂有飛泉如帶舜廟在山之陽

玉笥山

福地記曰此山地土肥美宜穀避兵又天監起居注云廬陵太守王希暉於此山之龍淵獲劍二口

太真白龜山經曰本名羣玉山胚渾初分此山積五色氣而成形覩若羣玉之狀皆虛無之貌浮焉至庖犧氏之時山乃堅實委地變為五色遂號為群玉山至夏殷

之世人多採其玉百靈慮損其山形遂化為五色土石而生之叢木今溪澗之中五色碧赤之石皆古變色

玉笥山記曰漢武好仙察衆仙之迹知此山為靈感之司遂以山頂致降真壇日夕祈禱天乃降白玉笥置壇上武帝遣使取至其壇則飄風大振卷玉笥而去因封為玉笥山又漢武時邑民伐材於山為廨館闕殿中梁一條邑民相謂曰欲精仙館在其梁棟未可以凡木為之經數旬未獲忽一夜震雷風烈天降白玉梁一條光

瑩耀目至今下有玉梁觀至魏武時遣人取之至其山
門亭午之際雷霆大震化為白龍擘烟霧而去晉永嘉
中有人見在都木岩下梁黃門侍郎蕭子雲建清虛館
兼撰立館碑經五載忽有一人來謂之曰館之東北有
洞曰都木坑水自東注可以久居矣子雲遂徙家居之
後全家隱洞中不知所之大厯初有道士謝修通者宜
春人也入山不出凡四十年如野人後遇一人引入溪
源於溪中得一碑長三尺乃蕭侍郎清虛之館碑更行

行半里見宅基古磚瓦石皆異遂結庵居之長慶初入都木坑偶見一宅重扉湏臾有一青衣童子招修通入見一人紫綬綈冠佩劍立堂之左一人碧綬素簡立堂之右童子曰左者蕭君右者隗君即梅福也通乃叩頭再拜求住修通好食小蒜二君曰子乃葷腥之人安能住此與通嘉禾五穗松葉十斤令頓服之服之中半二君乃令歸精神似不足眼目睢盱門人相謂曰師修行不出凡七十年為邪氣所亂大道何昧昧通至寶厯初

夢人告曰造一精舍待君既寤且曰我當死矣七日而卒門人求備棺櫬空見衣冠而已年九十八

太平御覽卷四十一

欽定四庫全書

太平御覽卷四十二

宋 李昉等 撰

地部七

河南宋鄭齊魯諸山

砥柱山

邙山

熊耳山

鼓鐘山

陸渾山

嶠山

青要山

缺門山

三塗山

女兒山

白馬山

太陰山

金門山

轆轤山

闕塞山

牧羊山

九山

大鬼山

桑山

半石山

天心山

少隄山

蘭岩山

礪山

厯山

南城山

奚公山

稽山

曹南山

嶧山

金鄉山

瑯琊山

龜山

徂徠山

危山

報山

尼丘山

羽山

華不注山

長白山

黟山

陶山

巫山

魚山

穀城山

勞山

蒙山

謝祿山

夾山

桃山

吠狗山

砥柱山

水經注曰砥柱山名也禹治洪水山陵當水者鑿之故
破山以通河河水分流包山而過山見水中若柱然故
曰砥柱

搜神記曰齊景公渡于江沅之河鼃銜左驂沒之衆皆
驚惕古冶子於是拔劍從之邪行五里逆之三里至于
砥柱之下乃殺鼃頭右手挾左驂燕躍鵠踴而出仰天
大呼水為通流三百步觀者皆以為河伯也

說文曰鳳鳥出東方君子之國過崑崙飯飲砥柱濯羽

弱水暮宿風光

邙山

說文曰邙洛陽北土山上邑也

十道志曰邙山在洛陽縣四十里

元和郡國志曰北邙山是隴山之尾一名平逢山亦名邙山

楊龍驤洛陽記曰北山連嶺修亘四百餘里實古今東洛九源之地也

又戴延之西征記云邙山西匡東垣阜相屬其下有張
母祠即永嘉中此母有神術能愈病故元帝渡江時延
聖母於丹陽即此母也今祠存焉

續漢書五行志曰靈帝時童謠曰侯非侯王非王千乘
萬騎上北邙中平六年獻帝為中常侍段珪等數人所
執公卿百官隨其後到阿上乃得還此非侯非王上北
邙也

魏畧曰魏文帝獵北邙上時盛夏炎暑行者或中暍鮑

勛切諫遂因此罷去

魏志曰明帝即位欲平北邙令登臺以觀見孟津廷尉辛毗諫曰天地之性高高下下今而反之既非其理加以損費人功民不堪役帝乃止

熊耳山

河圖括地象曰熊耳山地門也其精上為畢附耳星史記齊桓公曰寡人南伐至郡陵登熊耳山以望江漢東觀漢記曰赤眉初降輦輸鎧甲兵弩積與熊耳山等

盛弘之荊州記曰南鄭脩縣北有熊耳山山東西各一
峯傍竦南北望之若熊耳上多漆下多椶浮蒙之水出
焉西流注于洛又案山書謂此山上有青丹之樹得而
服之成仙

西京雜記曰葉似江離而紅綠色又有丹青樹葉一青
一赤望之如繡長安謂之丹青樹是也

鼓鐘山

山海經曰鼓鐘之山帝臺之所以觴百神者也有草焉

方莖而黃華圓葉而三成其名曰烏酰可以為毒也今名鐘山在陸渾縣西南三十里

陸渾山

山海經曰陸渾山伊水出焉今亦號方山漢末隱士潁川胡昭隱居山中有石城遠望之有金壇玉匱晶然間出尤好竹木泉石時有野人居之長生不死春秋時遷陸渾之戎意其遺類

嶠山

元和郡縣志曰二嶠山在今澠池縣西北一名嶠嶺也
左傳謂秦將襲晉蹇叔哭送謂收子骨後漢末建安中
曹公西討巴漢惡其險而更開北山道路多從之便又
有石銘云晉太康三年弘農太守梁柳脩復舊道

西征記曰嶠山上不得鳴鼓角鳴則風雨忽至自東嶠
至西嶠三十里東嶠長坂數里峻阜絕澗車不得方軌
西嶠全是石坂十二里險絕不異東嶠

傳曰杞子自鄭使告于秦曰鄭人使我掌北門之管若

潛師以來國可得也穆公名孟明西乞白乙使出師於東門之外蹇叔之子與師哭而送之曰晉人禦師必於崤崤有二陵焉其南陵夏后皋之墓也其北陵文王之所避風雨也必死是間余收爾骨焉

漢書曰景帝三年吳楚反以周亞夫為太尉擊吳楚亞夫發至灞上趙涉遮說亞夫曰吳王素富懷輯死士久矣此知將軍且行必置間人於崤澠阨陋之間將軍何不從此右去走藍田出武關抵雒陽間不過差一二日

直入武庫擊金鳴鼓諸侯聞之以為將軍從天而下也
太尉如其計至雒陽使吏搜崤澠間果得吳伏兵
三輔舊事曰鄧禹敗於潼關後大破赤眉於崤

青要山

山海經曰青要山實惟帝之密都畛水出焉有草黃華
赤實服之美人色水經注云強山東阜即騄山有美棗
焉

十道志曰青要山又名強山

缺門山

水經注曰缺門山山阜之不相接者一里故得名二壁爭高升聳相亂是也

三塗山

地里志曰三塗山在陸渾縣南左傳謂四嶽三塗九州之險或曰三塗者伊闕大谷轅轅三道是也

女儿山

元和郡縣志曰女儿山在福昌縣西南三十四里

山海經曰女兒山上多玉下多金其獸即豹麋麋禽多
鷓鴣

白馬山

十道志曰白馬山水經注云溪水出宜陽白馬山山上
有大石厥狀似馬故溪澗以物色受名焉

滑州白馬山門山圖云白馬羣行山上悲鳴則河決馳
走則山崩謂此山也

西征記云山有神白馬故名焉

太陰山

十道志曰太陰山左傳謂晉梁丙陰趯率戎伐潁

又云蠻子赤奔晉之陰也且自雒以東至陸渾謂此山也

金門山

阮籍宜陽記曰金山之竹堪笙管

楊泉物理論云宜陽金山竹為律管河內葭莩為灰可
以調氣

水經注曰金門溪出金山也

戴氏西征記曰宜陽縣地名金門塢

轅轅山

十道志曰轅轅山在緱氏縣之東南左傳曰轅盈過周王使侯出諸轅轅是也按轅轅道有十二曲今置關焉

薛綜注東京賦云轅轅坂十二曲道將去復還故曰轅轅

闕塞山

洛陽記曰闕塞山在河南縣左傳晉趙鞅納王使汝寬守闕塞伏虔謂南山伊闕是也

杜預云洛西南闕口也俗名龍門是也

牧羊山

陽城記曰牧羊山在陽城東八十里下有九十六泉即滄河之上源也父老云昔有一神蛟身自山而降下飲泉竭故以為名

九山

陽城記曰九山在縣南三十五里水經注云相澗水經九泉東仲長子云昔有上者身遊九山之上施心不拘之鄉即此山也山陰有九山廟碑晉永康二年立文曰九山府君者太華元子之稱也

大嵬山

陽城記曰大嵬山在密縣東南五十里即具茨之山黃帝登具茨之山升於供隄之上受神芝圖於黃蓋童子

即此也又名具茨山也又有方山一名浮戲山泥水出焉又有洧水出密縣西南馬嶺山

桑山

春秋曰鄭大旱使屠擊有事於桑山斬其木不雨子產曰有事於山藝山林也

藝養護也

而斬其木有罪大矣奪之

官邑

半石山

山海經曰半石山其上有草生而秀高大葉與花皆赤

而不實其名嘉榮服者不遷喜怒在縵氏南十五里

天心山

道書福地志曰天心之山方圓百里形如城四面有門
上有石墻長千餘丈山高谷深多生薇蘅其草有風不
偃無風獨搖天心山又名錫義山在豐利縣東六十五
里

少陘山

山海經曰少陘山器難之水出焉舊傳器難之水即索

水也少陘山一曰嵩渚山俗名周山去滎陽縣三十五里

蘭岩山

搜神記曰滎陽縣南有蘭岩山峭拔千丈常有雙鶴不絕往來

神仙傳曰昔有夫婦隱此山數百年化為兩鵠忽一旦有一鵠為人所害其一鵠歲常哀鳴

礪山

水經注曰碭縣分水北有碭水碭芒二縣之間山澤深固多懷神智有仙者涓子注主並隱碭山得道漢高隱之吕后望氣知之即於是處也

厯山

水經注曰雷澤西南十里許有一小山孤立峻上亭亭嶸峙謂之厯山山北有小阜南屬迤澤之東北有陶墟相傳為舜耕陶所在墟阜聯屬濱帶瓠子河鄭玄云山在河東今有舜墓皇甫謐曰或言今濟陰厯山是也與

雷澤相比余謂鄭玄之言為然

河東賦曰登厯山觀而遙望兮聊浮濟河之岩今雷首
厯觀厯山西枕大河校之圖緯於是為安

南城山

後漢書曰鄭玄漢末遭黃巾之難客於徐州今孝經序
鄭氏所作其序云僕避于南城之山棲遲岩石之下念
昔先人餘暇述夫子之志而注孝經蓋康成之孫所作
也今西上可二里所有石室焉周廻五丈俗云是康成

嘗注孝經處也

奚公山

楊曄徐州記曰奚公山奚仲造車之所山上軌轍猶存

嵇山

水經注曰嵇山嵇氏故居也嵇康本姓奚會嵇人先人自會稽遷于譙之銍縣故為嵇氏取嵇字之義以為姓蓋志本也

曹南山

十道志曰曹南山曹風所謂薈兮蔚兮南山朝濟是也
有泥水出焉即漢書云高祖即位於泥水之陽今壇存

焉

泥音
沅

嶧山

書禹貢曰嶧陽孤桐泗濱浮磬

鄭玄注曰嶧山今在
下邳西嶧山也

詩曰奄有鳧嶧遂荒徐宅

鳧宅
二山

爾雅曰魯國鄒縣有嶧山絕石相積構屬而成山

史記曰始皇二十八年始皇東行郡縣上鄒嶧山立石

與魯諸生議刻石頌秦德

三代地理書曰秦始皇乘羊傳車登嶧山

鄒氏記曰鄒山古之嶧山也孤桐之所植邾文公之所卜下山是鄒縣本是邾國魯穆公改鄒山從邑變故謂鄒山嶧陽猶多桐樹也

地理志云嶧山在鄒縣北繹邑之所依名也山東西二十里南北一十三里高秀獨出積石相臨無土壤石間多孔穴洞洞相通往往有如數間屋處其俗謂之嶧山

孔嶧遭亂輒將居人入嶧外寇雖衆無所施害永嘉中
太尉郗鑒將鄉曲逃此山胡賊攻守不能得今山南有
大嶧名曰郗公山北有絕岩秦始皇觀禮於魯登於嶧
山之上命丞相李斯以大篆勒名山嶺名曰畫門詩所
謂保有鳧嶧者也

金鄉山

戴延之西征記曰焦氏北有數山漢司隸校尉魯恭穿
山得白蛇白兔不葬更葬山南鑿而得金故曰金鄉山

山形峻峭塚前有石祠石廟廟四壁皆青石隱起自書
契以來忠臣孝子貞婦及孔子弟子七十二人形像像
邊皆刻石記之文字分明又有石牀長八尺磨瑩鮮明
叩之聲聞甚遠時太尉從事中郎傅珍之詔議參軍周
安穆折敗石牀各取之為魯氏之後所訟三人並免官

瑯琊山

史記曰始皇二十六年滅齊遂登瑯琊山築層臺於上
秦皇樂之因留三月是也

郡國道記云瑯琊臺在故城東南十里州東南一百七
十里臺上有始皇碑碑上有六百字可識餘多剝落臺
側有四時祠即齊地八祠之一又云臺上有神泉人或
汚之即立竭

龜山

水經注曰龜山在博縣一十五里昔夫子傷政道之陵
遲故望山而懷操故琴操中有龜山操焉山北即龜陰
之田也春秋定公十年齊人來歸龜山之田是也

徂徠山

水經注曰鄒山記云徂徠山在梁甫奉高博三縣界猶有美松亦曰尤疎之山

危山

漢書五行志曰哀帝時無鹽危山土自起覆草如馳道狀

報山

報山石轉立晉灼曰漢注作報山山脅右一枚轉側起

立高九尺六寸旁行一丈廣四寸東平王雲及后謁自
之石所祭治石象報山立石祠之三年息夫躬告之王
自殺后謁棄市國除

尼丘山

水經注曰沂水出魯城東南尼丘山西北山即顏母所
祈而生孔丘也山東一十里有顏母廟防山南數里孔
子父葬處禮所謂防墓崩者也

羽山

十道志曰羽潭一名羽池潭東有羽山

漢志曰東海郡祝其縣有羽山殛鯀之所

郡國志曰鍾離沫城有羽山殛鯀處其水恒清牛羊不飲

書曰殛鯀于羽山

又曰蒙羽其藝

左傳昭公七年鄭子產聘于晉平公有疾韓宣子逆客私焉曰寡君寢疾于今三月矣並走羣望有加而無瘳

今夢黃熊入于寢門其何厲鬼也對曰以君之明子為大政其何厲之有昔堯殛鯀于羽山其神化為黃熊入于羽淵實為夏郊三代祀之韓子祀夏郊晉侯乃間

華不注山

傳曰齊師與晉戰於鞍齊師敗績晉逐之三周華不注山

水經注曰華不注山牙桀立孤峰特起青崖發翠同點黛焉

長白山

郡國志曰長白山陳仲子夫妻隱處

郭氏述征記曰長白山能興雲雨山西南有太湖山二山並有石室敗赤漆船上有記皆謂之堯時物

黉山

三齊記略曰鄭玄註詩經常棲黉山山有石井不竭猶生細草葉形似韭俗稱鄭公書帶

陶山

齊地記曰范蠡浮海出齊變姓名自號鴟夷子間行止於陶山因號陶朱公焉後改曰鴟夷山在今平陰縣東

巫山

又曰巫山一名孝堂山

左傳曰齊侯登巫山以望晉師即此山下也山上有石室俗傳云郭巨葬母之所因名孝堂山焉在平陰縣

魚山

郭延生述異記曰魚山一名吾山瓠子歌所謂也魏熹

平中有神女智瓊降弦超室

西征記曰魚山臨河神女智瓊與弦超會所魏陳思王
曹植嘗登此山有終焉之志遂葬其西亦其封圉也按
魚山在東阿縣東北

穀城山

漢書曰穀城山昔張良受黃石公素書謂云山下黃石
即吾也穀城山一名黃石山在東阿縣東北

勞山

伏琛齊記曰不其城南二十里有大勞山小勞山在海側

晏謀齊記曰俗云太山自言高不如東海勞即此也

蒙山

高士傳曰老萊子隱於蒙山之陽以葭為蓋蓬為室岐木為牀耆文為蓆衣縕飲水墾山播植楚王親至其門方織畚王去有間其妻攜菜畚挾薪而至問車馬跡之多答曰楚王妻曰可食以酒肉者可加以鞭捶可授以

官祿者可隨以鈇鉞先生受人官祿為人所制妾不能為人所制者妻棄畚萊而去也

東蒙山在蒙山之東故曰東蒙論語云昔者先王以為東蒙主是社稷之臣也何以伐為

謝祿山

郡國志曰東海郡有謝祿山按漢書王莽時東海徐宣謝祿等擊王莽時田況大破之曾屯兵於此因名謝祿山在縣西一里

夾山

地理志曰懷仁縣有夾山

左傳齊魯會于夾谷即此也在縣西四十里


桃山

地理志曰桃山華萊山也一名義珠山山上有井不可
窺窺者不盈歲輒死

又云山上井有鳥巢於井中此鳥金喙黑色見則大水

吠狗山

地理志曰吠狗山宋武北伐南燕之時至此山夜聞犬
吠明日視之唯見石狗



太平御覽卷四十二

欽定四庫全書

子部

太平御覽卷四十三至
七

詳校官侍讀學士臣沈咸熙

貢外郎臣牛稔文覆勘

總校官降調編修臣倉聖脈

校對官中書臣袁文邵

謄錄監生臣蕭日昕

欽定四庫全書

太平御覽卷四十三

宋 李昉等 撰

地部八

商洛襄鄧淮蔡諸山

白於山

商山

玄扈山

望楚山

石梁山

薤山

峴山

白馬塞山

高車山

桐栢山

武當山

大狐山

石魚山

苦菜山

大洪山

赤岸山

莫耶山

雲母山

濠塘山

九關山

塗山

八公山

蔡山

玉鏡山

皖山

雞籠山

梁山

都梁山

斗山

臺子山

長圍山

白於山

水經曰白於山今名女郎山上多松栢下多樗櫟其獸

多作

音

牛羆羊鳥多白鵝洛水出于其陽東注于淮也

又云洛水源出縣北白於山

又曰漢水女郎山山上有女郎冢遠望山墳崔嵬狀高及即其所裁有墳形山上直路下出不生草木世人謂之女郎道下有女郎廟及搥衣石言張魯女也

商山

盛弘之荊州記曰上洛有商山班孟堅西都賦所謂商洛緣其隈高士傳謂地肺即此

晉書曰董景道少好學恒獨居略不與世通永平中知

天下將亂隱商洛山衣木皮葉食樹果彈琴歌嘯以自娛至劉曜時徵拜太常辭以壽終

玄扈山

春秋合誠圖曰黃帝遊玄扈上洛與大司馬容光左右

輔周昌等百二十人臨之有鳳啣圖以置帝前

玄扈山在上洛

縣北一百里

望楚山

襄陽記曰望楚山有三名一名馬鞍山一名灾山宋元

嘉中武陵王駿為刺史屢登之舊名望郢山因改為望
楚山後遂龍飛是孝武望之處時人號為鳳嶺高處有
三塔即劉弘山簡九日賞宴之所也

石梁山

襄陽記曰襄州石梁山山起白雲則雨黃雲則風黑雲
則人多病

薤山

襄陽記曰襄陽縣薤山山上有竹三年生一筍筍成竹

死代謝如春秋焉

峴山

十道志曰羊祜嘗與從事鄒潤甫共登峴山垂泣曰自有宇宙便有此山由來賢達勝士登此遠望如我與卿者多矣皆湮滅無聞不可得知念此使人悲傷我百年後魂猶當遊此也潤甫對曰公德冠四海道嗣前哲令聞令望當與此山俱傳若湛輩乃當如公語耳後人以州人思慕遂立羊公廟并碑於此山

白馬塞山

盛弘之荊州記曰孟達為新城太守登白馬塞山而歎
曰劉封申耽據金城千里而不能守豈丈夫也為上渚
吟方士今猶傳此聲韻憤激其哀思之音乎游者云重
山疊障事信然也

高車山

高士傳曰高車山上有四皓碑及祠皆漢惠帝所立也
漢高后使張良詣南山迎四皓之處因名高車山也

桐栢山

河圖括地象曰桐栢山為地穴上為維星

荊州圖經曰桐栢山禹貢所謂導淮自桐栢者也其山則雲峯秀峙桐栢陰森

武當山

山記曰武當山區城周廻四五百里中央有一峯名曰叅嶺高二十餘里望之秀絕出於雲表清朗之日然後見峯一月之間不見四五輕霄蓋於上白雲帶其前旦

必西行夕而東返常謂之朝山蓋以衆山朝揖之主也
又南雍州記曰武當山有石門石室相承云尹喜所棲
之地又陰君傳云君字長生入武當山昇仙是也

又郭仲產南雍州記曰武當山廣三四百里山高隴峻
若博山香爐苔亭峻極干霄出霧學道者常百數相繼
不絕若於此山學者心有隆替輒為獸所逐

山海經曰祭水源伏流三百餘里漢武帝遣殿上將軍
戴生之入此山採仙藥遂得道不返

徵異傳曰歷陽謝允字道通年十五為蘇峻賊軍王免所掠賣屬東陽蔣鳳家嘗行山中見虎檻中狗竊念狗餓以飯飼之入檻方見虎攀木仰看允謂虎曰此檻本為汝施而我幾死其中汝不殺我我救汝乃開檻出虎賊平之後允詣縣別良善烏程令張球不為申理桎梏捶楚允夢見人曰此易入難出汝有慈心當與救拯因見一少年通身黃衣遙在柵外時進獄中與允言語獄吏知是異人由此不敢枉允蒙理還都西上武當山太尉

庾公聞而愍之給其糧資隨到襄陽見道士說吾師戴
先生孟盛子非世間人也勅若有西上欲見我者可將
來得無是君允因隨去入武當山齋戒三日進見先生
乃是昔日所夢人也問允復見黃童不因賜以神藥三
九服之便不飢渴無所思欲先生亦無常處時有神雲
紫氣次陰其上或聞芳香之氣徹於山谷

大狐山

水經註曰大胡山在泚陽縣界東三十餘里廣圓五六

十里張平子西都賦所謂天封大胡者也胡一作狐南陽圖經曰此山之上有大石其狀如狐故世俗謂為大狐山也

石魚山

水經註曰石魚山本名立石山高八十餘丈廣十里石色黑而理若雲母間發一重輒有魚形鱗鬣首尾有若刻畫長數寸魚形備足燒之作魚膏腥因以名之

苦菜山

郡國志曰苦菜山即黃城山也自葉至泚陽南北相毗連亘百里亦曰長城山即長沮桀溺耦耕處下有東流水即子路問津之所尸子云楚狂接輿耕於方城即此山也春秋曰方城以為城是也

大洪山

水經注曰蔡陽縣東南大洪山山在隋郡之西南竟陵之東北盤基所跨廣圓一百餘里峯曰懸釣處衆阜之中為諸嶺之秀山下有石門疊嶂層巒岩高皆數百許

仞入石門又得鍾乳穴穴上赤崖壁立非人跡所及穴中多鍾乳凝膏下垂望齊冰雪微津細液滴瀝不斷幽穴潛遠行者不窮其深而穴內常有風勢火無經久也湏水出此山之陰其初流淺狹遠乃寬廣可以浮舟棧矣時人以湏水所導故亦謂之湏山

赤岸山

南兖州記曰瓜步山東五里江有赤岸山南臨江中羅君章云赤岸若朝霞即此是也濤水自海入江衝激六

七里至此岸側其勢始衰郭景純江賦云鼓洪濤於赤岸

莫耶山

壽春圖經曰莫耶山長老傳云古者於此山鑄莫耶劍因為山名

史記賈誼弔屈原篇云莫耶為鈍兮鉛刀為銛注云莫耶吳大夫姓也

王僧虔吳郡地理志云吳人造劍二陽曰干將陰曰莫

耶莫耶其妻名

南州記曰濠水東合流千金塘源出縣西莫耶山是也

雲母山

壽春圖經曰雲母山一名濠上山在州東南四十里按神仙傳云彭祖服食雲母時人共傳採於此山今或有道者採取不已

濠塘山

壽春圖經曰濠塘山在縣南六十里有濠水出焉古老

所傳岩上泉灌濠城塘故以為名山穴多出鍾乳并有蝙蝠白艾色於穴中倒懸微帶紫色居人或於九月以後二月以前採取服之頗益壽

九關山

壽春圖經曰九關山一謂陰陵山

江表傳云項羽敗烏江取此山過漢遣灌嬰追羽兵至此一日九戰因名九關山今石猶有磨刀礪鏃之跡

塗山

應劭漢地理志曰禹娶塗山塗山有禹墟

太康地記曰塗山古當塗國夏禹所娶也西南又有禹村蓋禹會諸侯於塗山在禹貢揚州之域今九江當塗縣有禹娶之地邑界有當塗山故城存焉即漢縣後廢郡國志曰平河縣有當塗山出於荆山之左當塗之右奔流二山之間而揚濤北注也

春秋左氏傳曰哀公七年諸大夫對孟孫曰禹會諸侯於塗山執玉帛者萬國杜預注曰塗山在壽春縣東北

也余按家語曰吳伐越至會稽獲骨焉其節專車吳子使使問孔子孔子曰丘聞之昔禹致羣臣於會稽之山防風氏後至禹殺之其骨專車此為大也蓋丘明親承聖旨錄為實証矣又按劉向說苑辨物王肅叙孔子九世孫孔晁所出先世舊家語並出此事故塗山有會稽之名考校羣書及方土之目疑非此矣

八公山

水經注曰壽春縣八公山山無樹木唯重阜耳山上有

淮南王劉安廟劉安王是漢高帝之孫厲王長之長子也折節下士篤好儒學養方術之徒數十人多神仙秘法鴻寶之道忽有八公皆鬚眉皓素詣門希見閤者曰吾王好長生今先生無救衰之術未敢聞八公俄變成童王甚敬之八士並能鍊金化丹從有八無乃與安登山埋金於地白日昇天餘藥在器雞犬舐之者俱得上昇其所昇之處踐石皆陷入焉故山即以八公為目

蔡山

懷寧圖經曰蔡山出大龜尚書云九江納錫大龜即謂蔡山也

玉鏡山

懷寧圖經曰玉鏡山在縣北萬歲鄉界貞元二年從皖山東面忽然爆裂皓然如玉行路遠見如鏡懸焉其年刺史呂魏聞之因山改萬歲為玉鏡鄉其山西隅連皖山東面

皖山

漢書地理志曰皖山在瀟山天柱峯相連其山三峯鼎峙疊障重巒拒雲概日登陟無由山經云皖山東面有激水冬夏懸流狀如瀑布下有九泉井有一石牀可容百人其井莫知深淺若天時亢旱則殺一犬投其中即降雷雨犬亦流出

雞籠山

歷陽圖經曰雞籠山在縣西北淮南子云麻胡初陷之時有一老母提雞籠以登此山因化為石今山有石狀

如雞籠因為名也

梁山

歷陽圖經曰梁山在縣南俯臨江水南之博望山宋書云孝武帝大明七年登梁山大閱水軍于中江是日有雀二集于華蓋有司奏請改元為神雀元年帝不許因立雙闕於梁山

都梁山

盱眙圖經曰都梁山周迴三十里在縣南按廣志云都

梁山生淮蘭草一名梁香草故以為名在楚州西南二百九里

又阮昇之記云都梁山通鍾離郡廣袤甚遠出桔梗芫花等藥

伏滔北征記云有都梁香草因以為名又曰大業元年煬帝創立宮都東鄰都梁西枕長淮南望岩峯北瞰城郭其中宮殿三重長廊周廻院之西又有七眼泉涌合為一流於東泉上作流杯又於宮西南淮側造釣魚臺

臨淮高峯別造四望殿其側又有曲河以安龍舟大舸
枕倚淮湄索帶宮殿至十年為孟讓賊於此置營遂廢

斗山

盱眙圖經曰斗山周廻二十里在縣西南與都梁山相
連枕淮之險峻名曰斗山

臺子山

盱眙圖經曰臺子山周廻一十里在縣東一里按宋書
云元嘉二十七年宋將臧質引兵下造弩臺以射城中

因以為名按臺子山在楚州西南是

長圍山

盱眙圖經曰長圍山周廻四里在縣北七里上置軍營
將士一千人守之至德二年節度使高道置按宋書云
元嘉二十七年宋文帝遣臧質拒魏太武帝遂於梁山
築長圍城造浮橋絕水路即此山又改為長圍山當在
楚州西南一百八十里

太平御覽卷四十三

欽定四庫全書

太平御覽卷四十四

宋 李昉等 撰

地部九

關中蜀漢諸山

吳山

銅梁山

高梁山

九峻山

截薛山

驪山

龍首山

藍田山

筭頭山

雞頭山

牛首山

五將山

仇池山

賀蘭山

太白山

岷山

石鏡山

青城山

邛崃山

牛頭山

董政山

綏山

覆船山

靈臺山

黃廐山

彭亡山

鼎鼻山

金山

五婦山

靈山

猿門山

閨山

盤龍山

玉女山

祁山

青石山

雲南山

禺同山

弔鳥山

吳山

周禮雍州其山鎮曰嶽山孫炎曰雍州鎮有吳嶽山也
郭璞曰吳嶽別名吳山

漢書地理志云吳山在汧縣西故語謂之西吳秦都咸
陽以為西岳

酈道元水經註云汧水發南山西側俗以為吳山其山
三峯望之恒有落勢山下有石穴廣四尺高七尺赤水

溢石穴懸波傾注浦瀾奔盪發源成川北流注于汧是也

銅梁山

左太冲蜀都賦云外負銅梁山渠張孟注云銅梁山名也按其山有桃枝竹西東亘二十餘里山嶺之上平整遠望諸山而此獨秀也

山在州南九里

高梁山

江原記云南浦郡高梁山尾東跨江西首劔閣東西數

千里嶺長峻其峯崔嵬於蜀市望之若長雲垂天一日行之乃極其頂俯視衆山泯若平原劒閣銘謂岩岩梁山積石峨峨即述此也

九峻山

四夷郡國縣道記曰九峻山東連仲仁西當涇水焉又九峻山高六百六十丈周十五里在咸陽

截薛山

四夷郡國縣道記曰截薛山在雲陽縣東北十里一名慈

峨山勢嵯峨山頂有雲起即雨故里人以為候昔黃帝鑄鼎於此山

驪山

三輔故事曰始皇葬驪山起陵高五十丈下錮三泉周迴七百步以明珠為日月魚膏為脂燭金銀為鳧雁金蠶三十箱四門施徹奢侈太過六年之間為項籍所發放羊兒墜羊塚中燃火求羊燒其櫛藏

述征記曰長安東則驪山西則白鹿原北望雲陽悉見

山阜之形而恒若在雲霧之中孟康曰昔周幽王悅褒姒不好笑王乃擊鼓舉烽以徵諸侯至而無寇褒姒乃笑王甚悅之及犬戎至王舉烽以徵諸侯不至王遂敗身死于驪山之北

龍首山

辛氏三秦記曰龍首山長六十里頭至渭水尾連樊川頭高二十丈尾漸下高五六丈土赤不毛昔有黑龍從山出飲水其行道成土山今長安城即疏山為臺殿基

址不假築其含元殿即龍首山之東麓高敞為京之最
階高於平地三十餘尺南去丹鳳門四百餘步中無間
隔左右寬平東西廣百步兩都賦云漢之西都實曰長
安左據函谷二嶠之岨右界褒斜龍首之險表以太華
終南之山帶以洪河涇渭之川即此之形勢也

藍田山

後魏風土記云藍田巔方二里仙聖遊集之所劉雄鳴
學道於山下有祠甚嚴蓋灞水源于此西又有尊盧氏

陵次北有女媧氏谷則知此地是三皇舊居於是

筭頭山

史記云黃帝西至于崆峒登筭頭

圖經云筭頭山在涇陽西禹貢涇水所出

淮南子云薄浴山一名筭頭山

水經注云大隴之山異名耳莊子謂廣成子學道於崆峒之山蓋黃帝問道於廣成子亦在此山按今肅州又有崆峒之山未詳孰是今此見有栢堂在山頂上不知

何代所置也後漢隗囂使王孟塞雞頭道謂此山也

雞頭山

崔鴻十六國春秋云石生不能守長安欲西上隴士卒散盡遂入雞頭山為追兵所害山在鄠縣東

牛首山

山海經曰牛首山潑水出焉而注于滴水魚多非魚狀以餌可療痔疾

又曰牛首山有鬼草赤莖葉如葵秀如禾服之使人不

憂

五將山

崔鴻十六國春秋曰苻堅為慕容冲所逼長安城中
有書曰古苻傳賈錄載帝出五將久長得先是又謠曰
堅入五將久長得堅大信之率騎數百出如五將宣告
州郡期孟冬救長安堅至五將山姚萇遣將軍吳忠圍
堅衆奔散忠執堅以歸新平即此山也

仇池山

辛氏三秦記曰仇池山上有百頃地平如砥其南北有山路東西絕壁百仞上有數萬家一人守道萬夫莫向山勢自然有樓櫓却敵之狀東西二門盤道可七百里上有岡阜泉源史記謂秦得百二之固也西晉末為氐楊茂搜所據於山上立宮室困倉皆為板屋乃氐之所理於此今謂之洛谷道是也

秦州記曰仇池山本名仇羅山形似覆壺上廣百頃下周數十里高二十餘里壁立千仞自然樓櫓却敵分置

均調竦起數丈有如人力也

賀蘭山

涇陽圖經曰賀蘭山在縣西九十三里山上多有白草
遙望青白如駁馬北人呼駁馬為賀蘭因名賀蘭山鮮
卑等類多依山谷為氏族今賀蘭姓名皆因此山

太白山

辛氏三秦記曰太白山南有陳倉山山有石與山雞不
別趙高燒山雞飛去晨鳴山頭聲三十里或謂是玉雞

錄異傳云秦文公時雍南山有大梓樹文公伐之輒有大風雨樹生合不斷有一人病夜往山中聞有鬼語樹神秦若使人被髮以朱絲繞伐樹汝得不憂否文公如其言伐樹樹中有一青牛出走入壇水中復出使騎擊之不勝騎墮地復上髮解牛乃畏之入水不出故置髦頭騎也

岷山

山海經曰岷山江水出焉而東流注于大江其中多恠

蛇有鳥焉其狀如鶚而赤身白首其名曰竊脂可以禦火

石鏡山

華陽國志曰疊州合川縣石鏡山在縣西北四十五里其山有石光瑩皎潔照之莫不備見形體故謂之石鏡山山下又有銅窟隋初於此置監鼓鑄錢刀焉

青城山

福地記曰青城山高三十六百丈周匝五十里有甘露

芝草天池醴泉

玉匱經云黃帝封為五岳丈人乃岳瀆之上司真仙之
崇秩一月之內羣岳再朝六時酒泉以代晷漏一名赤
城一名青城都一名天谷山亦為第五洞天寶仙九室
之天對郡之西北在岷山之南羣峯掩映互相連撞虛
無所宅祥異則多

益州記曰崗巒山領嶠相連千里上有仙都

地理志云西徹之外江水所出天彭青城連峯不絕

李膺記云入山七里至赤石城有羊馬臺三師壇上五里至瀑布水澗二百步有二石梯有一石筭其高三丈過二石門絕崖數百丈下起常道觀高峯下有水不時灑落東北有二石室名龍宮可容百餘人從龍宮過石室至石梯名龍橋又有一石梯洞穴深淺莫知所極西北有石室宛然見存又有黃帝壇石法天上圓下方濶一丈二尺有十二角觀東刻日月各濶五尺厚一尺二寸相對柱上烏兔輝鏤方圓磅礴可觀

五岳真形圖云洞天所在之處其下別有日月分精以照其中龍橋處二山相去百餘步其峯危竦相對橋在峯首其橋中半漸漸促小可六七寸長一丈五尺兩邊懸崖俯臨不測山傍有誓石天師張道陵與鬼兵為誓朱華盡山青崖中絕今驗斷處石並丹色潤二十丈深六七丈望之截然

邛崃山

山海經曰邛崃山江水出焉

今在漢中嚴道縣中江所出有九折坂出獸似熊

其

陽多黃金其陰多麋其木多檀柘也

華陽國志曰嚴道縣南有邛崃山上凝冰夏結縈迴
九折王陽去官之所

牛頭山

九州記云牛頭山昔日葛仙翁多遊於此今立為寺與
白獸山相連者秦世有白獸為害夷人射之刻白石於
此今遺像尚存

董政山

十道記曰董政山隋開皇中縣令董政封高雅之士去
官之後民咸思其德因指山為董政山

綏山

列仙傳曰葛由者蜀之羗人周成王時刻木為羊賣之
一旦乘木羊入蜀蜀中王侯賓之上綏山山在安國縣
東三十里隨之人皆得仙術

覆船山

十道錄曰覆船山堯遭洪水維舟山下船因覆焉

又益州記云覆船山中十五里有七里坂一名羊腸坂
屈曲難昇

靈臺山

十道記曰靈臺山在縣北一名天柱山高四百丈即漢
張道陵昇真之所

郡國志曰靈臺山天柱崖下有一桃樹高五尺皮是桃
心肉似栢張道陵與王良趙昇試法於此四百餘年桃
迄今不朽小碑記之

黃厥山

郡國志曰黃厥山有鍾乳穴十九又西岸有自然石竇其下流水上有一懸石似磬擊之有聲可聽

彭亡山

十道記曰彭亡山後漢將軍岑彭征公孫述於此山戰死故號曰彭亡山

鼎鼻山

十道記曰鼎鼻山周道衰微九鼎淪沒於此山之下其

水清澄今民猶或見其鼎耳

金山

益州記曰金山在涪縣東五十步東臨澗水光照映川
又李膺記云金山長七八里每夏潦雨有崩處即金粟
散出是也

五婦山

蜀記云梓潼縣有五婦山一名五婦臺秦王遺蜀王美
女五人蜀王遣五丁迎五女至梓潼五丁躍地大呼驚

五女並化為石蜀王築臺登而望之因名為五婦臺焉

靈山

郡國志曰靈山者有神女於此搥衣因號搥衣山山南絕岩有方石明瑩謂之玉女搥練砧又有盤龍山以山形如盤龍也

猿門山

益州記曰猿門山在涪縣之北二十五里上多猿其山二峯磷豎如門故曰猿門

閬山

閬山圖經曰閬山四合於郡故曰閬中按名山志云閬山多仙聖遊集焉

盤龍山

李膺益州記云閬中盤龍山南有一石長四十丈高五尺當中有戶兩扇若人之掩閉古老以為玉女房

玉女山

梁州記云肥城東南有玉女山山有一石穴中若房宇

玉女入穴不出穴前有修竹下有石壇風微動竹拂壇如簫

祁山

關山圖曰漢陽西南有祁山九州之名阻天下奇峻按蜀志云建興六年諸葛亮率師攻祁山不拔即謂此也又按九州志云祁山上有高樓武陟二神祠每歲郡邑祀之

青石山

益州記云昔巴蜀爭界久而不決漢高帝八年一朝密霧石為之裂今猶如之自上及下破處直若引繩焉於是州界始判山上有古神祠甚靈今名青石山

雲南山

九州要記云雲南郡山山有神處石室稱黃石公祀之必用紙一百張筆一雙墨一丸室內有啟必知吉凶但不見其形

禺同山

九州要記曰禹同山有金馬碧鷄之祠

弔鳥山

九州要記曰弔鳥山在葉榆縣葉榆則雲南郡廢邑也
山上有鳥千百羣飛啁啾一歲必一度大集即鳳凰死
地也

太平御覽卷四十四